

Samkeppnisreglurnar banna hvers konar samræður, samninga eða leynilegt samkomulag, samhæfðar aðgerðir á milli fyrirtækja eða gagnkvæma miðlun upplýsinga um:

- Verðlagningu (núgildandi eða síðar meir), verðbreytingar (t.d. upphæðir, prósentuhlutfall eða vísitölu), verðlagningarstefnu, hagnað, afslætti, bónusa, gjöld, fjárframlög, lánaskilmála, leiðbeiningar um verðútreikninga/verðbreytingar o.s.frv.
- Markaðsskiptingu.
- Framleiðslu- eða dreifingarkostnað, líkön um kostnaðarútreikninga með „sýnidæmum“, spár um kostnaðarþróun, raunveruleg kostnaðarviðmið og kvóta.
- Tölur og/eða áætlanir hvað varðar birgja, framleiðslu, lager, sölu, markaðssetningu og söluhvetjandi starfsemi.
- Öll málefni sem varða birgja eða viðskiptavini, þar með talið allar tilraunir til sameiginlegra aðgerða sem geta haft þau áhrif að útiloka birgja eða viðskiptavini frá markaði.
- Upplýsingar um framtíðaráætlanir sem varða vísindalega/tæknilega þróun og fjárfestingar.



LEYFILEG HEGÐUN. HVAÐ MÁ RÆÐA?

- **Heimilt er að ræða** viðeigandi tæknileg málefni sem ekki eru trúnaðarmál, að því gefnu að ekki sé hægt að misnota þau til þess að útiloka einhvern frá markaði, svo sem staðla, umhverfisreglur, málefni tengd heilbrigðis- og öryggisþáttum og þróun á löggjöf, regluverki og stjórnámálum.
- **Heimilt er að ræða** opinberlega aðgengilegar upplýsingar um þróun á markaði.
- **Þá er einnig heimilt að ræða** almenna söluhvetjandi starfsemi, að því tilskildu að farið sé að reglum, um kynningu og auglýsingar á lyfjum og þess háttar (á ekki við um áætlanir fyrirtækja um söluhvetjandi aðgerðir).



Frumtök
Húsi atvinnulífsins
Borgartúni 35
105 Reykjavík
S. 588 8955
www.frumtok.is
frumtok@frumtok.is

Umbraco.Pirelli.ehf

SAMKEPPNISREGLUR

Leiðbeiningar fyrir fundi á vegum Frumtaka
Mars 2012



INNGANGUR

Reynsla bæði hér og erlendis sýnir að starfsemi hagsmunasamtaka keppinauta á samkeppnismarkaði getur leitt til þess að það dragi úr samkeppni á viðkomandi markaði. Enda er það svo að í samkeppnislögum er sérstaklega er fjallað um ábyrgð samtaka fyrirtækja, stjórnarmanna þeirra, starfsmanna og annarra trúnaðarmanna.

Takmarkanir á þeirri starfsemi sem heimilt er að reka innan hagsmunasamtaka grundvallast fyrst og fremst á þeirri hættu sem kann að skapast á brotum á samkeppnisreglum. Frumtök leggja því höfuð áherslu á að starfsemi samtakanna samræmist lögum í hvívetna. Af þeirri ástæðu ber, án undantekninga, að forðast alla upplýsingamiðlun og aðgerðir sem kunna að orka tvímælis í samkeppnisréttarlegu samhengi. Til að vinna að því markmiði og til að tryggja sem frekast er unnt að starfsemi Frumtaka sé í löglegum og faglegum farvegi, eru þessar leiðbeiningar um samskipti á vettvangi Frumtaka settar fram.

Markmið þessara leiðbeininga er að tryggja að starfsfólk og/eða samstarfsfólk á vegum Frumtaka, hvort heldur er í hlutverki sínu sem skipuleggjandi og/eða þátttakandi í fundum, aðgerðum, hópastarfi o.s.frv., með þátttöku fyrirtækja í samkeppnisrekstri, taki ekki þátt

í starfsemi eða háttsemi sem mögulega gæti verið brot á samkeppnisreglum. Leiðbeiningarnar eiga jafnframt að hindra að starfsfólk aðildarfyrirtækja sem tekur þátt í fundum á vegum Frumtaka verði, meðvitað eða ómeðvitað, þátttakendur í slíkum mögulegum brotum.

Öll aðildarfyrirtæki Frumtaka og starfsmenn þeirra, Frumtök og starfsmenn Frumtaka og aðrir sem að starfsemi Frumtaka koma, skuldbinda sig til að fara eftir reglum þessum í hvívetna. Þá skulu þessir aðilar ekki aðhafast neitt það sem kann að orka tvímælis þegar lög og reglur um samkeppni eru annarsvegar. Brot gegn reglum þessum varðar brottrekstri úr Frumtökum.

Mikilvægt er að kynna sér og framfylgja reglum þessum af nákvæmni. Athugið, að verði um einhver brot á samkeppnisreglum að ræða, má draga aðildarfyrirtæki, Frumtök og aðra aðila til ábyrgðar.

BESTU STARFSHÆTTIR

- Allir fundir sem Frumtök skipuleggja eða taka þátt í skulu sannarlega hafa lögmætan tilgang.
- Fyrir fundi skal senda út dagskrá til þátttakenda ef fundinn sitja starfsmenn fyrirtækja sem eru í samkeppni. Fundarmenn skulu halda sig við fundarefni dagskrár.
- Fulltrúi frá skrifstofu Frumtaka skal sitja alla fundi á vegum Frumtaka.
- Ef umræður nálgast það að geta verið brot á samkeppnisreglum eða orka með einhverjum hætti tvímælis, ber fulltrúa Frumtaka skilyrðislaust og án tafar að stöðva umræðurnar.
- Leiki vafi á því hvort umræður eru lögum samkvæmt, skulu fundarmenn hætta þeim, uns hægt er að fá lögmæti þeirra staðfest. Við slíkan úrskurð skulu reglur um samkeppni ávallt njóta vafans.
- Viðmið um aðild að t.d. ráðum, nefndum og vinnuhópum Frumtaka skulu vera gagnsæ og skal gæta jafnræðis. Málefnaleg sjónarmið, líkt og sérþekking og reynsla, skulu ávallt höfð að leiðarljósi þegar að því kemur að velja eða hafna fulltrúum í starfsemi Frumtaka.
- Þessar leiðbeiningar eiga við um alla fundi á vegum Frumtaka. Reglur þessar eiga einnig við á samkomum utan hefðbundins vinnutíma og athöfnum af félagslegum toga sem haldnar kunna að vera á vegum Frumtaka. Sé aðgangur veittur að skrifstofu- og fundaraðstöðu Frumtaka vegna starfsemi félaga, annarrar en á vegum samtakanna og án þátttöku starfsfólks Frumtaka, skal engu að síður farið að leiðbeiningum þessum.
- Í 12. gr. samkeppnislaga segir að samtökum fyrirtækja sé óheimilt að ákveða samkeppnishömlur eða hvetja til hindrana sem bannaðar eru samkvæmt lögum.
- Af þessu leiðir að margvíslegar aðgerðir samtaka fyrirtækja, s.s. tilmæli, ráðleggingar eða upplýsingargjöf, geta fallið undir 12. gr. samkeppnislaga ef þessar aðgerðir hafa það að markmiði eða af þeim leiðir að komið sé í veg fyrir samkeppni eða henni raskað. Öll slík háttsemi er af þeim sökum bönnuð af og innan Frumtaka.

EFTIRFARANDI ER ÓHEIMILT ÁN ALLRA UNDANTEKNINGA OG SKILYRÐA

Bannaðir eru hvers konar samningar, munnlegt eða þegjandi samþykki, og/eða samstilltar aðgerðir sem hafa það að markmiði eða sem leiða til þess, beint eða óbeint, í raun eða mögulega, að koma í veg fyrir, takmarka eða brengla samkeppni. Þá er öll sú háttsemi bönnuð sem leiða má líkur að, eða túlka mætti á þann hátt að, hún félli undir framangreint.

Í stuttu máli sagt er um að ræða bann við allri háttsemi sem miðar að því að takmarka samkeppni eða kann að hafa þau áhrif. Ganga leiðbeiningar þessar lengra en kveðið er á um í lögum og banna jafnframt þá háttsemi sem túlka má með þeim hætti að hún falli undir framangreint. Það skal haft í huga að jafnaði er farið með samhæfðar aðgerðir um verðlagningu og landfræðilega skiptingu markaðssvæða sem sérstaklega alvarleg og refsiverð lögbrot sem leiða til mjög hárra sektargreiðslna og jafnvel fangelsisvistar.

Lagaákvæði Samkeppnislög 10. gr.

Allir samningar og samþykktir milli fyrirtækja, hvort heldur þær eru bindandi eða leiðbeinandi, og samstilltar aðgerðir sem hafa að markmiði eða af þeim leiðir að komið sé í veg fyrir samkeppni, hún sé takmörkuð eða henni raskað eru bannaðar.

Bann þetta tekur m.a. til samninga, samþykktu og samstilltra aðgerða sem:

- áhrif hafa á verð, afslætti, álagningu eða önnur viðskiptakjör með beinum eða óbeinum hætti,
- takmarka eða stýra framleiðslu, mörkuðum, tækniþróun eða fjárfestingu,
- skipta mörkuðum eða birgðalindum,
- mismuna viðskiptaaðilum með ólíkum skilmálum í sams konar viðskiptum og veikja þannig samkeppnisstöðu þeirra,
- setja sem skilyrði fyrir samningagerð að hinir viðsemjendurnir taki á sig viðbótarskuldbindingar sem tengjast ekki efni samninganna, hvorki í eðli sínu né samkvæmt viðskiptavenju.